



## Í steinasafni Petru á Stöðvarfirði


Steinasafn Petru,  
séð frá gótu.

Sigurjón Bjarnason  
tók allar myndir  
með grein.

Steinasafn Petru er einstakur áfangastaður. Safnið er kennt við Stöðfirðinginn Petru Sveinsdóttur sem hefur byggt það upp af miklum dugnaði. Steinunum á safninu hefur Petra safnað sjálf fyrir ofan byggðina á Stöðvarfirði, alla leið suður til Berufjarðar og norður til Borgarfjarðar eystri. Söfnunarþörf hefur markað líf Petru eins og sjá má á þessu einstæða safni sem einnig var heimili

hennar, Sunnuhlíð á Stöðvarfirði. Petra er fædd árið 1922 og vann öll störf sem félle til í litlu sjávarþorpi svo sem landbúnaðarstörf, heimilisstörf og við fiskvinnslu. Safnið segir að nokkru leyti sögu fyrri tíma með sjaldséðum húsmunum og leirtaui úr búi foreldra hennar frá fyrri hluta síðustu aldar sem auk steinanna eru til sýnis á safninu. Á safninu má sjá lítinn hluta af þeim tólum og tækjum sem voru notuð við dagleg störf og

Í garðinum  
umhverfis safnið.





til sjósóknar á fyrri tímum. Fyrst og fremst er safnið þó steinasafn. Finna má einstaka hlýju sem leikur um fyrrum húsakynni þessarar merku konu og tekur á móti fólki með mikilli gleði og þrótti.

Bak við húsið er garður þar sem gríðarlega mörgum steinum hefur verið listilega komið fyrir ásamt samspili vatns, gróðurs og skrautmunu. Garðurinn allur er sannkallað augnayndi og er í stöðugri uppbyggingu og þróun. Þar er einnig að finna garðhýsi þar sem sjá má mikið lesefni um Petru, ævi hennar og steinasöfnunina. Auk þess er miklum fjölda steina raðað upp inni í húsinu auk fjölda uppstoppaðra fugla sem safninu hefur áskotnast í gegnum tíðina. Gott samræmi er í uppsetningu á munum, flokkun er skilmerkileg og merkt á íslensku og latínu. Steinunum á safninu er haganlega fyrir komið og viða er lesefni um þá. Af því er nokkuð jarðfræðilegs eðlis en einnig talsvert um lækningamátt og önnur áhrif sem ýmsir steinar ku hafa. Fjölskylda Petru sér alfarið um uppröðun og viðhald á safninu. Ekki hefur verið leitað til sérfræðinga við hönnun eða skipulag safnsins heldur byggir það alfarið á hugmyndum Petru sjálfrar.

Safnið hefur vaxið og dafnað á undanförnum árum og uppbygging þess tekur aldrei enda.

Mikill fjöldi fólks heimsækir safnið á ári hverju. Talsvert er um gesti sem ýmist trúa á mátt steinanna eða heimsækja safnið í fræðilegum tilgangi. Safnið er auk þess orðinn einn helsti viðkomustaður ferðamanna sem leið eiga um sunnanverða Austfirði.

*Steinum er haganlega komið fyrir í glæsilegum garði umhverfis safnið.*

Rétt er að vekja athygli á heimasíðu safnsins á veraldarvefnum en þar er gríðarlega mikið lesefni um ævi og störf Petru, steinana á safninu, lækningamátt þeirra og ýmislegt fleira. Slóð heimasíðunnar er: [www.steinapetra.com](http://www.steinapetra.com).

*Einnig eru steinar úr safni Petru til sýnis inni. Skólesít.*

